

景明刻本古今逸史

四七

華陽國志卷第十一

晉 常璩 著

明 吳琯 校

後賢志

聞之善志者述而不作序事者實而不華是以史遷之記詳於秦漢班生之書備乎哀平皆以世及事邇可得而言也西州自奉聖晉後俊瑋倜儻之士或脩德讓行止從時或播功立事羽儀上京策勲王府甄名史錄侔於先賢會遇喪亂軋遘華夏顛墜典籍多缺族祖武平府君愍其若斯乃操簡援翰拾其遺闕

然但言三蜀巴漢未列又務在舉善不必珍異揆之
耆舊竹素宜闡今更撰次損益足銘後觀凡二十人
綴之斯篇雖行故墜沒大較舉其一隅

衛尉散騎常侍文立廣休

散騎穆穆誠感聖君

西河太守柳隱休然

西河烈烈秉義居真

漢嘉太守司馬勝之興先

漢嘉克讓謙德之倫

郫令州主簿常助修業

郗君謇諤自固底身

江陽太守何隨季業

江陽皎皎命世清淳

梓潼太守王化伯遠

梓潼矜矜在險能平

太子中庶子陳壽承祚

庶子稽古遷固並聲

漢中太守李宓令伯

漢中矍矍才蓋羣生

犍爲太守杜軫超宗

韃爲印印友于是令

給事中任熙伯遠

給事溫恭尚德茂榮

中書郎王長文德雋

中書淵識寶道韜明

大長秋壽良文淑

長秋忠肅明允篤誠

大司農西城公何攀惠興

司農運籌思侔良平

少府成都威侯李穀允剛

少府果壯文武是經

衡陽內史楊邠岐之

衡陽固節隱然不傾

尚書三州都費立建熙

尚書準繩古之遺直

湘東太守常騫季慎

湘東汜愛仁以接物

武平太守常寬泰恭

武平疊疊冰清玉嶷

揚烈將軍梓潼內史譙登慎明

江陽太守侯馥世明

文立字廣休巴郡臨江人也少遊蜀太學治毛詩三禮兼通羣書州刺史費禕命爲從事入爲尚書郎復辟禕大將軍東曹掾稍遷尚書蜀并于魏梁州建首爲別駕從事咸熙元年舉秀才除郎中晉武帝方欲懷納梁益引致雋彥泰始二年拜立濟陰太守武帝立太子以司徒李胤爲太傅齊王驃騎爲少傅選立爲中庶子立上疏曰伏惟皇太子春秋美茂盛德日

新始建幼志誕陟大繇猶朝日初暉良寶耀璞侍從
之臣宜簡俊又妙選賢彥使視觀則覩禮容揀揀之
則聽納當受嘉話駭耳之言靜應道軌動有所采佐
清初陽緝熙天光其任至重聖王詳擇終非糞朽能
可堪任臣聞之人臣之道量力受命其所不諧得以
誠聞帝報曰古人稱與田蘇遊非舊德乎立上故蜀
大官及盡忠死事者子孫雖仕郡國或有不才同之
齊民爲劇又上諸葛亮蔣琬費禕等子孫流徙中畿
宜見叙用一則以慰巴蜀民之心其次傾東吳士人
之望事皆施行十年詔曰太子中庶子立忠貞清實

有思理器幹前在濟陰政事修明後事東宮盡輔導之節昔光武平隴蜀皆收其才秀所以援濟殊方伸叙幽滯也其以立爲散騎常侍累辭不許上疏曰臣子之心願從疏以求昵凡在人情貪從幽以致明斯實物性賢愚所同臣者何人能無此懷誠自審量邊荒遺燼犬馬老甚非左右機納之器臣雖至愚處之何顏詔曰常伯之職簡才而授何謙虛也立自內侍獻可替否多所補納甄致二州人士銓衡平當爲士彥所宗故蜀尚書犍爲程瓊雅有德望素與立至厚武帝聞其名以問立立對曰臣至知其人但年垂八

十稟性謙退無復當時之望不以上聞耳瓊聞之曰
廣休可謂不黨矣故吾善夫人也西界獻馬帝問立
馬何如對曰乞問太僕帝每善其恭慎遷衛尉猶兼
都職中朝服其賢雅爲時名卿連上表年老乞求解
簪還桑梓帝不聽咸寧末卒帝緣立有懷舊性乃送
葬于蜀使者護喪事郡縣修墳塋當時榮之初安樂
思世子早沒次子宜嗣而思公立所愛者立丞諫之
不納及愛子立驕暴二州人士皆欲表廢立止之曰
彼自暴其一門不及百姓當以先公故得爾也後安
樂公淫亂無道何攀與上庸太守王崇涪陵太守張

寅爲書諫責稱當思立言凡立章奏集爲十篇詩賦
論頌亦數十篇同郡毛楚楊崇皆有美德楚牂牁守
崇武陵太守

柳隱字休然蜀郡成都人也少與同郡杜禎柳仲竝
知名隱直誠篤亮交友居厚達於從政數從大將軍
姜維征伐臨事設計當敵陷陣勇畧冠軍爲牙門將
巴郡太守騎都尉遷漢中黃金圍督景耀六年魏鎮
西將軍鍾會伐蜀入漢川圍戍多下惟隱堅壁不動
會別將攻之不能克後主旣降以手令敕隱乃詣會
晉文帝聞而義之咸熙元年内移河東拜議郎武帝

踐祚以爲西河太守在官三年以年老去官乞骸還

蜀卒於家時年八十長子充連道令次子初舉

秀才

杜禎字文然柳仲字雅厚州牧諸葛亮辟爲從事禎
符節令梁益二州都督仲度支禎子瞻字伯重畧陽
護軍仲漢嘉巴東太守大同後並舉秀才瞻子彌字
景文仲子純字偉淑有名德幹器舉秀才巴郡宜都
建平太守西夷長水校尉巴東監軍

司馬勝之字興先廣漢綿竹人也學通毛詩治三禮
清尚虛素性澹不事榮利初爲郡功曹甚善綱紀之
體州辟從事進尚書左選郎徙秘書郎時蜀國州書

佐望與郡功曹參選而從事侔臺郎時重察舉雖位經朝要還爲秀孝亦爲郡端右景耀末郡請察孝廉大同後梁州辟別駕從事舉秀才歷廣都新繁令政理尤異以清秀徵爲散騎侍郎以宗室禮之終以疾辭去職卽家拜漢嘉太守候迎盈門固讓不之官閑居清靜謙卑自牧常言世人不務求道德而汲汲於爵祿若吾者可少以爲有餘榮矣訓化鄉閭以恭敬爲先年六十五卒於家子尊賢佐皆有令德

常勗字修業蜀郡江原人也祖父員牂犍永昌太守父高廟令從父閎漢中廣漢太守勗少與閎子忌齊

名安貧樂道志篤墳典治毛詩尚書涉治羣籍多所
通覽州命辟從事入爲光祿郎中主事入爲尚書左
選郎郡請迎爲功曹時州將董軍政置從事職典刑
獄以勗清亮復爲督軍治訟平當還察孝廉除郾令
爲政簡而不煩魏征西將軍鄧艾伐蜀破諸葛瞻於
綿竹威振西土諸縣長吏或望風降下或委官奔走
勗獨率吏民固城拒守後主檄令乃詣艾故郾穀帛
全完刺史袁邵嘉勗志節辟爲主簿勗善儀容翔集
動爲表觀言論壯烈州里重之然交友惟賢不交下
已者汎愛之恩猶不足邵征還道卒忌字茂通蜀謁

者黃門侍郎喪親以致孝聞察孝廉爲郎使吳稱職
歷長水參軍什邡雒令大同後刺史邵坐治城被徵
忌詣洛陳訴遠國初附君民始結不宜改易又表脩
治城池居安思危邊將常職事皆中情晉文帝時爲
相國辟忌舍人武帝踐祚拜騎都尉除河內令州名
爲難治忌挫折豪勢風教大行縣有姦嫂殺兄者羣
黨蔽匿前令莫得忌皆窮治入爲州都方議爲郡守
會卒忌爲人信道任數不從下人故爲貴勢所不善
是以作詩著論先攻已短臨喪與樂歡哀俱至爲士
類所稱忌友人廣漢段宗仲亦有學行蜀時官與忌

比袁邵爲主簿與忌共理郡事文帝善之梁州辟別
駕從事舉秀才稍遷官至雲南建寧太守

何隨字季業蜀郡郫人也漢司空武後世有名德徵
聘入官隨治韓詩歐陽尚書研精文緯通星曆郡命
功曹州辟從事光祿郎中主事除安漢令蜀亡去官
時巴土饑荒所在無穀送吏行乏輒取道側民芋隨
以縣繫其處使足所取直民視芋見縣相語曰聞何
安漢清廉行過從者無糧必能爾耳持綿追還之終
不受因爲語曰安漢吏取糧令爲之償察孝廉大同
後臺召不詣除河間王郎中令不就居貧固儉衣弊

蔬食晝躬耕耨夕脩講諷鄉族饋及禮厚皆不納目不視色口不語利著譚言十篇論道德仁義常有屠牽猪過隨門猪索斷失之強認溷中猪隨便牽猪與之屠人出門尋得其所亡猪謝隨還猪遂以包之有家養竹園人盜其笋隨遇行見之恐盜者覺怖走竹中傷其手足挈屐徐步而歸其仁如此太康中即家拜江陽太守民思其政年七十一卒官後州鄉人言議平當者皆相謂何江陽至于汶山夷有正直廉讓者亦號夷中何江陽杜景文何興仁皆爲作傳長子觀字巨忠清公淑慎知名州里察孝廉西都南安令